

Dibikila kudi bidia bia dilolo didi tshifuanyikiji tshia dibikila dia Lumu Luimpe didi kudi bantu bonso. Nansha bantu ba bungi badipidia, diulu newikale muuje tente ne bobo badi bitabuja dipa dia Nzambi.

Mushinga wa Lupandu udi Mukole be

Mukanda wa Nzambi udi wamba ne, “Mushinga wa kupikula nawu mioyo yabo udi mukole” (Musambu 49:8). “Kanueni bena mioyo yenu. Bualu bua nuakasumbibua ku mushinga mukole; nunku nutumbishe Nzambi mu mubidi wenu.” (1 Kolinto 6:20)


“Tudi ne kupikudibua kudiye bua mashi andi, ne kubuikidibua kua malu mabi etu bu mudi bubanshi bua ngasa wandi. Bualu bua nudi basungidibue ku ngasa bua ditabuja; ne diodi kadiena difuma kunudi, ndipa dia Nzambi; kadiena difuma ku midimu, bua muntu kaditumbishi.” (Efeso 1:7. 2:8,9)

Lupandu lunene ludi lutupandisha kudi tshiji tshia Nzambi

Tshiji tshidiku! Bantu bakatombokela Nzambi. Bakashipa Mutumibue wandi, mulue bua muntu yonso wakamuitabuja bu Musungidi ne Mukelenge wikale ne muoyo wa tshiendelele. Mukelenge Yesu wakamba ne, “Udi witabuja Muana udi ne muoyo wa tshiendelele; kadi udi upidia Muana kena umona muoyo, tshiji tshia Nzambi tshidi tshishala nandi.” (Yone 3:36)

“Tuetu mene netupanduke munyi bituapetula lupandu bunene nunku?” (Ebelu 2:3)

Netupanduke Munyi Bituapetula Lupandu Bunene Nunku?



Lupandu ludi Bunene bualu bua Butumbi bua Mupi walu

“Pandi ntangila diulu diebe, didi mudimu wa bianza biebe, ne ngondo ne mitoto biwakufuka; muntu udi nganyi bua wewe kumuelela meji? Ne muana wa muntu udi nganyi bua wewe udi umulama ne dinanga?” (Musambu 8:4)

Mupi udi Nzambi wa butumbi. Lupandu ludi dipa dia dinanga diandi. Dituku dikuabo Mukelenge Yesu wakadi mushikame kukala kua dina dia mayi, diba diakadi munda munya. Pakalua mukaji wa mu Samalea bua kusuna mayi, Yesu wakamuambila ne, Umpe mayi a kunua. “Mukashi wa mu Samalea waka-mukonka ne, Wewe Muena Yuda udi undombela meme Muena Samalea mayi a kunua tshinyi? (Bualu bua Bena Yuda kabena babuelakana ne Bena Samalea.) Yesu wakamuandamuna ne, Bu wewe mumanye dipa dia Nzambi ne wakukulomba ne, Umpe mayi a kunua, wewe wakadi kumulomba ne yeye wakadi kukupa mayi a muoyo. Wanua mayi aa neikale ne nyota kabidi, kadi wanua mayi anamupa kena wikala ne nyota kabidi tshiendelele; mayi anamupa neikale munda muandi bu mushimi wa mayi abanda mu muoyo wa tshiendelele.” (Yone 4:9,10,13,14)

Nzambi udi Nzambi wa diulu ne buloba

“Nzambi wakafuka buloba ne bintu bionso bidipu, bualu bua yeye udi Mukelenge wa diulu ne buloba, katu wikala mu bitendelevu bidi bibaka ku bianza bia bantu. Bianza bia bantu kabiena bimukuatshila mudimu, bu padiye ne tshintu bualu, bualu bua yeye mene utu wapa bantu bonso muoyo ne mupuya ne bintu bionso. Yeye kabidi wakafuka bisamba bionso bia bantu, bafuma mu muntu umue, bua kuikalabo pa buloba buonso; wakatapulula bikondo biabo bidianjile kulongolola diambedi, ne mikalu ya miaba yabo yashikamabo. Wakenza

nunku bua bakebe Nzambi, benda babubuta bua kumumonabo, kadi yeye kena netu kule kudi muntu ne muntu.”

(Bienzedi 17:24-27)

Lumu Luimpe ludi kudi Bantu Bonso

Lumu luimpe lua disanka dinene

Mukenji wa muanjelo kudi balami ba mikoko, bakadi balama mikoko yabo mu butuku, pakaledibua Yesu mu Betelehemu wakadi ne, “Kanutshinyi, bualu bua nakunuluila ne lumu luimpe lua disanka dinene nedikale kudi bantu bonso; lelu bakunulelela Musungidi mu musoko wa Davidi, yeye udi Kilisto Mukelenge.”

(Luka 2:10,11)

Kunyima kua lufu luende pa mutshi mutshiamakane ne dibika diandi, Yesu wakambila bayidi bandi ne, “Yayi biena, nuvuije ba bisamba bionso bayidi, nubabatize mu dina dia Tatu ne mu dia Muana ne mu dia Nyuma Muimpe.”

(Matayo 28:19,20)

Lusumuinu lua bidia bia dilolo

Mukelenge Yesu wakamba ne, “Muntu wakadiku, wakalamba bidia bia dilolo bia bungi, wakabikila bantu ba bungi. Pakafika diba dia kudia, wakatuma muntu wandi bua kuambila bakadiye mubikile diambedi ne, Luayi, bualu bua bintu bionso bidi bilongolola” (Luka 14,16,17). Buonso buabo bakapidia dibikila dia muena nzubu. “Muntu wakalua, wakambila mfumu wandi malu aa. Muena nzubu wakadi ne tshiji, wakambila muntu wandi ne, Ya biebe lubilu mu misesu ya musoko ne mu tushila tukese, ulue ne bapele ne batapa ne bafoko ne balema. Muntu wandi wakamba ne, Mfumu wanyi, bakuenza bu muwakuamba, kadi miaba mikuabo idi mishale. Mfumu wakambila muntu wandi ne, Ya biebe mu misesu ne pabuipe ne mpangu, ubabueje mu nsubu, uule tente. Ndi nuambila ne, Banakubikila diambedi, kakuena umue wabo udi mua kulabula bidia bianyi.”

(Luka 14:21-24)